



Alberto Covelo Casal, presidente da Comunidade de Montes de Vincios asegura ter o compromiso de tódolos partidos políticos con representación no concello de Gondomar e o Parlamento Galego para manter o Acto de Prevalencia que dende 2002 lle permite manter o monte a resguardo de iniciativas alleas aos intereses dos comuneiros. Grazas a esta figura a Comunidade impediu en 2002 a instalación dunha macro canteira nas súas parcelas e agora impediría a utilización de 420 hectáreas de monte para a colocación de muíños de vento.

Nunha conversación con Valminor.info, Alberto Covelo dixo que a asemblea da Comunidade decidiu que non necesita do proxecto eólico para a súa supervivencia. Ao mesmo tempo sinalou, que o colectivo ten en marcha o Plan do decenio 2010 - 2020 para o Galiñeiro cunha perspectiva multifuncional do seu uso. Na mesma destaca unha plantación experimental con diferentes clones de máis de 18 especies, outras tradicionais de carballos e castiñeiros. A isto se agregan iniciativas como a utilización de 7 hectáreas para cogomelos, e outras 16 que se están pechando para os gandeiros e que terá o saneamento en condicións segundo as normas veterinarias en vixencia. Por último, Covelo recordou que dentro das actividades da Comunidade está o polígono industrial A Pasaxe.

Dende o mes de setembro, a directiva da Comunidade de Montes de Vincios ven traballando neste sentido e xa mantivo reunións coas executivas do PSOE, PP, BNG e Move Gondomar no plano local. O compromiso obtido foi a celebración no próximo mes de xaneiro dun pleno onde se vote a inclusión na redacción do PXOM de Gondomar, dunha figura de protección para a serra do Galiñeiro.

Ao mesmo tempo realizou varias visitas á cámara autonómica onde os parlamentarios da comisión de Industria e Medio Ambiente formularon o compromiso de votar unha nova declaración de Acto de Prevalencia. Covelo confirmou que xa ten o compromiso dos parlamentarios do PP, PSOE e BNG.

Alberto Covelo aclarou que non está en contra da enerxía eólica, per si da instalación dos parques en calquera zona. Por outra banda, afirmou que respecta a decisión de aquelas organizacións que decidan aceptar para lograr sobrevivir co canon que pagarán as empresas.

Vincios lograría unha figura de protección para as súas 420 ha afectadas polo parque eólico.

Escrito por Alvaro Peralta

Luns, 27 Decembro 2010 22:33

Por último, opinou que nesta nova lei a decisión dos propietarios "non pinta nada", e si non hai acordos entre propietarios e empresas o final é a expropiación.